

Sartè

Cità altera, cità maiò, arritta è fiera, cità di i sgiò
Fatta par sparta, fatta par dà, campà sempri in cumunità
A li to peda, lu Rizzanesi, fiumu sacratu di i Sartinesi,
Si scola lindu in la piana, da u Tallanesu sin' à Pruprià
Stendi u so sguardu, sin' à a muntagna, quassù li forchi, duva
và l'altagna

Zonza , Bavedda è Surbuddà sò li paesi ch'edda vedi in dà

E vedi Cagna à lu meziornu, l'Omù ti varda tuttu lu ghjornu
Di punta ad edda, ci hè Roccapina, hè la so spiaghja la più
divina

E lu Lionu a sà curà è a fighjula in Eternità
E ci hè ancu una turricedda, chì si ni stà, zitta è ribedda

E lu calvariu di San Damianu, di la cità hè lu vardianu
E feghja è cura à Sartè com'una guida, lu so rè
E li so mura sò li rampali contr' à u nemicu è lu furdanu
Daretu ad edda, ti ni stà cheta pà piattà tutti li to secreta

Ci hè chì Sartè hà un distinu, pà certi, ùn vali un cinquinu
Par Edda, ùn ci sarà mai bë, ma sò ghjilosi di Sartè
Ci hè chì trà Borgu è Sant'Anna, ci sò nati pienti è affanni
Ci era vindetta da lu bisbigliu, danni, sciaguri è parapiglia

Da Piazza Porta à Manichedda, è da Sant'Anna à la Scaledda
Stretti, carrughji, li to ghjuvedda, loca di ghjocu par li
ziteddi

E ci hè Lu Corsu pà spassighjà, da man' à sera, ci hè da cuntà
Tutti li fatta di la ghjurnata, tutti li foli di sta cuntrata

Vennari Santu, contr' à u piccatu, U Catinacciu, croci hà
purtatu

Santa Maria, ghjesgia maiò, aprarà tutti li so purtò
L'omu farà lu so viaghju è mandarà u Gran' Missaghju
Pà Curschedda ... Paci eterna ... scaccià casticu, dolu è pena

Cità altera, cità maiò, arritta è fiera, cità di i sgiò
Fatta par sparta, fatta par dà, campà sempri in cumunità
A li to peda, lu Rizzanesi, fiumu sacratu di i Sartinesi,
Si scola lindu in la piana, da u Tallanesu sin' à Pruprià
Stendi u so sguardu, sin' à a muntagna, quassù li forchi, duva
và l'altagna

Zonza ,Bavedda è Surbuddà sò li paesi ch'edda vedi in dà

Antone Marielli